

Василий Ушаковлы – 70 арес

Аслыз ачиз режиссёр



Национальной библиотеке лэн «ВКонтакте» бамысьтыз

Василий Ушаков режиссёрез зечкыла мукетыз режиссёр Александр Блинов.

15-тй инвожое актёр, режиссёр, Удмурт Элькуньсь культура удысьсы дано ужась Василий Ушаков Йоскалык библиотекае эшъёссэ, чыжы-выжыоссэ но тодмооссэ люкал-ляз. 70 аресъем юбилеезлы сйзъыса, татын «Аслыз ачиз режиссёр» жыт ортчиз.

Василий Серафимович вордскиз 17-тй инвожое Глазов ёросысь Вуж Эбга гуртын. Школаез йылпумъяса, Йоскалык театрлэсь конкурссэ ортчиз но Москвае Щепкин нимо театральной училищее дышетскыны пыриз, бöрысь ГИТИС-ын режиссёрлэн уженыз тодматскиз.

1973-тй арын В. Ушаков Удмурт театрын ужаны кутскиз, отын 30-лэсь трос спектакльёс пуктитз. Нош 1993-тй-1995-тй аръёсы, «Удмуртия» телеканалын ужакуз, Михаил Петровлэн «Италмас» поэмаезъя телевизионной фильм лэсьтитз.

Василий Серафимович али но уг буйгатскы, удмурт лулчеберетэз узырмытыны тырше. Юбилеез азын «Яратон, яратон...» книгазэ поттитз, отчы удмурт кылын 4 пьесаез пыриз. Яратон Василий Серафимовичлэн сюлэмаз каръяськемын: ужезтэк улыны уг быгаты.

Творческой жытын Василий Ушаковез Антон пиез зечкылаз, аслэсьтыз кырзэнзэ быдэстиз. Василий Серафимович зеч пи будэтэм.

Котырес лыдпусэзлы сйзем пумиськон тодэ ваёнъёсын тырмиз: режиссёр мадиз, кызы театре, телевидение вуиз, кызы «Ватка» театральной этностудиез кылдытитз... Удмурт кун университетын «Ватка» студия 2011-тй арысен ужа ни. Паймымон, кызы Василий Серафимович та аръёс чоже быгатиз сое аслаз пельпум вылаз нуыны, арысь аре сое кужмогес но мургес карыны.

Милемлы, «Ватка» студия пыр потэм студентъёслы, Василий Серафимович туж трос сётитз, дышетиз асьмелэсь лулпушмес валаны, дуннелы усътиськыны. «Ватка» — Василий Серафимовичен кылдытэм бадзым но чебер дунне, со трос студентъёслы дорлуиз.